

# INUIT ATAQATIGIIT INATSISARTUNI



UPA2022/155

Maajip 11-at 2022

Mariia Simonsen

**Organistiniq amigaateqarneq, suullu peqqutaanersut pillugit Naalakkersuisut UKA2023-mi agguassassamik nalunaarusioqqullugit Inatsisartut aalajangiiffigisassaattut siunnersuut. Nalunaarusiami akissarsianut tunngasut, ilinniartitsinikkullu neqeroorutaasinnaasut il.il. qulaajarneqassapput, kiisalu qanoq iliornikkut amigaateqarneq qaangerniarneqarsinnaanersoq pillugu Naalakkersuisut siunnersuuteqassasut.**

(Inatsisartunut ilaasortaq Siverth K. Heilmann, Atassut)

Oqaluffinni pattattut amigaataanerat sunik pissuteqarnerisut misissoqqullugu Atassummit Siverth K. Heilmannip siunnersuutaa pisariaqavissuq aalajangiiffigisassanngorlugu saqqummiunneqarmat Inuit Ataqatigiinnit qutsatigaarput.

Oqaluffinni pattattut 1987-imili ilinniarsinnaalerput, ullumikkulli atorfiit affaannaat inuttaqarput. Amerlanerit eqqaamassavaat siornaanngorpoq nalinginnaasunngoraluarmat naalagiat pattattoqaratik tussiarpaluttut radiukkut tusaasaleraluaratsigit. Qujanartumik tamanna ullumikkut qaangerneqarsimavoq, pattattussaqaarniarnerli suli ajornartorsiutaasoq Siverth K. Heilmannip tunngavilersuutaasigut erserpoq.

Oqaluffinni pappattut sapaataannakkut sulineq ajortut Atassummit oqaatigineqareerpoq. Pattattut ilinniartitaanerat pillugu nalunaarut naapertorlugu pattattut suliassaasa ilagaat erinarsoqatigiinnik sungiusaaneq ilagiinnilu nipilersornikkut allatigut misigisaqartitsinissaq. Pattattuuneq atorfiuvoq suliassaaleqiffiusussaangitsoq, sungiusartuarnermi,

# INUIT ATAQATIGIIT INATSIARTUNI



sungiusaanermillu imaqartoq, ilagiinni inuiannilumi nipilersukkat aqqutigalugit anersaakkut nukittorsaaqataaffiusoq.

Pattattut ilinniarsimasut amigaatigineqarmata uppernarpiangilarluunniit, nalunngilarpummi kalaallit akunnitsinni nipilersornermik piginnaanilippassuaqartoq nipilersuut suugaluartorluunniit tigugaangamikku apperiaannarnik – aamma ilinniarsimangikkaluarlutik. Piginnaaneq taanna atorluartariaqarparput. Pattattutut ilinniarnermi nipileronerup ilinniagassat assigiinngitsut ilinniarneqartarput, soorlu nuutersorluni pattannermik, nipilersornerup teknikkianik, erinarsoqatigiinnik sungiusaanermik allarpassuarnillu. Piginnaanerit tamakku atorfissaqartippagut, neriuppugullu aporfiit taakkartorneqartut sunik pissuteqarnerannik qulaajaaneq iluaqusiiumaartoq.

Taama oqaaseqarluta Siverth K. Heilmannip siunnersuutaa taparserparput ataatsimiititaliamilu susassaqtumi suliarineqarnissaanut innersuullugu.